

Det het he dänn ook trülich doahn,
Het oft mi schräwen ut Garnsohn,
Unn ach! so schön, dät mi doaröber
De Oogen immer gungen öber.

He het mi schickt ook mänchmoal wat,
Recht schmucke Bänner ut de Stadt,
Ohrring' met Bummeln von Koroalen,
De wiet se her to Schäpe hoalen. —

Ach joa, min Stoffel is mi goot,
Et is en recht oll godet Bloot;
't kann keenen bättern Bengel gäwen,
Drüm leew' ick mehr äm as min Läwen.

Ick hef äm nu nich sehn dree Joahr,
Unn dät he süß nich hässlich woar,
Det wusst' ick wol; denn worüm keeken s'
Mi immer hen noa äm, de Mäkens?